

船山遺書

冊七

周

江苏工业学院图书馆
藏书章

外傳

船山遺書 經部

中華民國廿二年十二月
上海太平洋書店重校刊

劉陽 李英侯 總勘
劉陽 張告吾 輯校
平江 李蘊平

周易外傳目錄

卷一

起乾訖否二十八論

卷二

起同人訖離二十三論

卷三

起咸訖井二十四論

卷四

起革訖未濟三十論

卷五

繫辭上傳十六論

卷六

繫辭下傳十五論

卷七

說卦傳七論

序卦傳七論

雜卦傳一論

周易外傳卷一

衡陽王夫之譔

乾

道體乎物之中以生天下之用者也物生而有象象成而有數數資乎動以起用而有行行而有得於道而有德因數以推象道自然者也道自然而弗藉於人乘利用以觀德德不容已者也致其不容已而人可相道道弗藉人則人與物俱生以俟天之流行而人廢道人相道則擇陰陽之粹以審天地之經而易統天故乾取用之德而不取道之象聖人所以扶人而成其能也蓋歷選於陰陽審其起人之大用者而通三才之用也天者象也乾者德也是故不言天而言乾也且夫天不偏陽地不偏陰男不偏陽女不偏陰君子不偏陽小人不偏陰天地其位也陰陽其材也乾坤其德也材无定位而有德德善乎材以奠位者也故曰天行健行則周乎地外入乎地中而皆行矣豈有位哉是故男德剛而女德柔君子德明而小人德暗男女各有魂魄君子小人各有性情男不無陰而以剛奇施者其致用

陽女不無陽而以柔偶受者其致用陰是故易之云乾云其致用者而已由此言之君子有情而小人有性明矣故小人之卽於暗也豈無穎光不昧知慙思悔之時哉此則乾之麗於小人者未嘗絕惟恃其自然忘其不容已則乾不絕小人而小人絕乾故易於小人未嘗不正告焉穆姜筮占四德而懼其驗也六陽之卦爲乾乾爲天易不云天而云乾用此義也或曰男不偏陽女不偏陰所以使然者天地天不偏陽地不偏陰所以使然者誰也曰道也曰老氏之言曰有物混成先天地生今曰道使天地然是先天地而有道矣不偏而成是混成矣然則老子之言信乎曰非也道者天地精粹之用與天地竝行而未有先後者也使先天地以生則有有道而無天地之日矣彼何寓哉而誰得字之曰道天地之成男女者日行於人之中而以良能起變化非碧霄黃壚取給而來貺之奚況於道之與天地且先立而旋造之乎若夫混成之云見其合而不知其合之妙也故曰无極而太極无極而必太極矣太極動而生陽靜而生陰動靜各有其時一動一靜各有其紀於是者乃謂之道今夫水穀之化爲清濁之氣以育榮衛其化也合同其分也纖

悉不然則病道有畱滯於陰陽未判之先而混成者則道病矣而惡乎其生天地也夫道之生天地者則卽天地之體道者是已故天體道以爲行則健而乾地體道以爲勢則順而坤無有先之者矣體道之全而行與勢各有其德無始混而後分矣語其分則有太極而必有靜動之殊矣語其合則形器之餘終無有偏焉者而亦可謂之混成矣夫老氏則惡足以語此哉故聖人見道之有在於六陽者而知其爲乾之德知其德之乾則擇而執之以利用故曰君子行此四德者故曰乾元亨利貞也

貞者事之幹也信也於時爲冬於化爲藏於行爲土於德爲實皆信也然則四德何以不言智乎彖云大明終始六位時成則言智也今夫水火資之以能熟木資之以能生金資之以能瑩土資之以能浹是故夫智仁資以知愛之眞禮資以知敬之節義資以知制之宜信資以知誠之實故行乎四德之中而徹乎六位之終始終非智則不知終始非智則不知始故曰智譬則巧也巧者聖之終也曰擇不處仁焉得智擇者仁之始也是智統四德而徧歷其位故曰時成各因其時而藉

以成智亦尊矣雖然尊者非用用者非尊其位則寄於四德而非有專位也今夫水非火則無以濟非木則無以屯非金則無以節非土則無以比是故夫智不麗乎仁則察而刻不麗乎禮則慧而輕不麗乎義則巧而術不麗乎信則變而譎俱無所麗則浮蕩而炫其孤明幻妄行則君子荒唐機巧行則小人捭闔故四德可德而智不可德依於四德效大明之功而無專位故曰君子行此四德者知而後行之行之爲貴而非但知也惟不知此故老氏謂上善之若水而釋氏以瓶水青天之月爲妙悟之宗其下者則刑名之察權謀之機皆崇智以廢德乃知大易之教爲法天正人之極則也子曰逝者如斯夫不舍晝夜夫逝者逝矣而將據之以爲德乎

先儒之言元曰天下之物原其所自未有不善成而後有敗敗非先成者也有得而後有失非得而何以有失也請爲之釋曰原其所自未有不善則既推美於大始矣抑据成敗得失以徵其後先則是刑名器數之說非以言德矣文言曰元者善之長也就善而言元固爲之長矣比敗以觀成立失以知得則事之先而豈善

之長乎彖曰大哉乾元萬物資始元者統大始之德居物生之先者也成必有造之者得必有予之者矣臻於成與得矣是人事之究竟豈生生之大始乎有木而後有車有土而後有器車器生於本土爲所生者爲之始揉之斲之埴之埴之車器乃成而後人乃得之旣成旣得物之利用者也故曰利物和義成得之未敗失者利物之義也夫一陰一陽之始方繼乎善初成乎性天人授受往來之際止此生理爲之初始故推善之所自生而贊其德曰元成性以還凝命在躬元德紹而仁之名乃立天理日流初終無間亦且日生於人之心惟嗜欲薄而心牖開則資始之元亦日新而與心遇非但在始生之俄頃而程子雞雛觀仁之說未爲周徧要其胥爲所得所成之本原而非從功名利賴之已然者爭敗失之先則一也意者立成敗得失之衡以破釋氏之淫辭邪則得之爾矣釋氏之言銷總別同異成壞之六相使之相參相入而曰一念緣起無生蓋欲齊成敗得失於一致以立真空之宗而不知敗者敗其所成失者失其所得則失與敗因得與成而見在事理之已然有不容昧者故獎成與得以著天理流行之功效使知敗與失者皆人情

弱喪之積而非事理之所固有則雙泯理事捐棄倫物之邪說不足以立雖然於以言資始之元則未也是故合成敗齊得失以爲宗釋氏緣起之旨也執成敗據得失以爲本法家名實之論也執其固然忘其所以然而天下之大本不足以立以成爲始以得爲德而生生之仁不著吾懼夫執此說者之始於義而終於利矣夫功於天下利於民物亦仁者之所有事而以爲資始之大用卽此在焉則享其利者爲有德亦且不知君子正誼明道之志未嘗擯失與敗而以爲非道之存況天之育萬物而非以爲功者哉元者仁也善之長也君子之以長人者也成敗得失又奚足論之有

易之有位也有同異而後有貴賤有應感而後有從違若夫乾則六陽均而成象者也合六如一不見其異六均一致不相爲感故曰大明終始終始不殊六龍皆御矣惟旣已成乎卦也則亦有其序也不名之爲貴賤而名之曰先後先後者時也故曰六位時成君子之安其序也必因其時先時不爭後時不失盡道時中以俟命也乃均之爲龍德則固不可得而貴賤之初者時之潛也二者時之見也三

者時之惕也四者時之躍也五者時之飛也上者時之亢也一代之運有建有成有守一王之德有遵養有燮伐有耆定一德之修有適道有立有權推而大之天地之數有子半有午中有嚮晦近而取之夫人之身有方剛有旣壯有已衰皆乾之六位也故象曰君子以自彊不息勉以乘時也然則初之潛龍其異於蠱之高尙遜之肥明矣大王翦商以前公劉遷豳以後周之潛也十三年之侯服武之潛也而不特此禮所自制樂所自作治所自敷教所自立未有事而基命於宥密終日有其潛焉有其潛所以效其見也若秦之王也穆康以來獻武以降汲汲於用以速其飛而早已自處於亢當其潛而不能以潛養之則非龍德矣非龍德而尸其位豈有幸哉故初之勿用天所以敦其化人所以深其息故曰君子以成德爲行日可見之行此之謂也

天以不遠物爲化聖人以不遠物爲德故天仁愛而聖人忠恕未有其德不能無歉於物有其德者無所復歉於己初之爲潛龍德成矣龍德成而有絕類於愚賤之憂則大而化者二之功邇而察者將毋爲二之所不屑也雖然彼龍者豈離田

以自伐其善哉故曰見龍在田王道始於耕桑君子慎於祐楹尸愚賤之勞文王所以服康田也修愚賤之節衛武所以勤洒埽也故天下蒙其德施言行詳其辨聚坦然寬以容物溫然仁以畜衆非君德誰能當此哉位正中而體居下龍於其時有此德矣然則馳情於玄悅傲物以高明者天下豈利見有此大人乎

九四之躍時勸之也九五之飛時叶之也上九之亢時窮之也若其德之爲龍則均也夫乾盡於四月而姤起焉造化者豈以陽之健行而怙其終哉時之窮窮則災矣然而先天而弗違則有以消其窮後天而奉時者則有以善其災故曰擇禍莫如輕知擇禍者悔而不失其正之謂也朱均之不肖堯舜之窮也桀紂之喪師禹湯之窮也堯舜不待其窮而先傳之賢以消其窮災不得而犯焉禹湯之持其窮也建親賢崇忠質不能使天下無湯武而非湯武則夏商不亡終不喪於口口盜賊之手景亳之命宗周之步猶禹湯晉諸廷而授之矣三代以下忌窮而悔所以處亢者失其正也而莫災於秦宋之季秦祚短於再傳宋寶淪於口口彼蓋詹詹然日喪亡之爲憂而能諸侯削兵柄自弱其輔以延盜賊口口而使乘吾之短

垣逮其末也欲悔而不得則抑可爲大哀也已嗚呼龍德成矣而不能不亢亢而不能不災君子於乾之終知姤之始亦勿俾羸豕之躡躅□□□□哉

天積日以爲歲功歲功相積而德行其中然期三百六旬之中擅一日以爲之始則萬物聽命於此一日德以有繫而不富矣且一日主之餘日晬之一日勤之餘日逸之其爲曠德可勝言哉夫用九者天行之健不得不極故其策二百一十有六自冬至子初授一策以極於大暑後之四日夏功成火德伏而後天之施乃訖焉則前乎此者雖夏至當上九之亢而乾行固未息也故坤不逮期之半而乾行過之其剛健精粹自彊不息者六爻交任其勞而不讓二百一十六策合致其能而不相先羣龍皆有首出之能而無專一之主故曰天德不可爲首明非一策一爻之制命以相役也然則一元之化一代之治一人之生一善之集一日之修一念之始相續相積何有非自彊之時可曰得其要而不勞擇其勝而咸利乎故論必定於蓋棺德必馴於至極治必臻於綏仁用九之吉吉以此爾自老氏之學以居錚處後玩物變而乘其衰言易者惑焉乃曰陽剛不可爲物先夫雷出而莠榮

氣升而灰動神龍不爲首而誰爲首乎德不先剛則去欲不淨治不先剛則遠佞不速婦乘夫臣干君□□夏皆陽退聽以讓陰柔之害也況足以語天德乎

知至至之知終終之大哉易不言中而可繹矣夫離出而上卽天也離天而下卽田也出乎田未入乎天此何位乎抑何時乎析之不容毫髮而充之則肆其彌互保合之爲太和を保不合則閒氣乘而有餘不足起矣乘而下退息於田而爲不足乘而上進與於天而爲有餘不足則不可與幾有餘則不可與存義勉其不足之謂文裁其有餘之謂節節文著而禮樂行禮樂行而中和之極建是故幾者所必及也義者所必制也人爲之必盡一間未達而功較密也天化之無方出位以思而反失其素也舍愚不肖之偷而絕賢知之妄日夕焉於斯擇之執之惡容不乾乾惕若哉夫九三者功用之終過此則行乎其位矣功用者我之所可知而位者我之所不可知也功用者太和必至之德位者太和必至之化也德者人化者天人者我之所能天者我之所不能也君子亦日夕於所知能而兢兢焉有餘不足之爲憂安能役心之察察強數之冥冥者哉此九三之德以固執其中盡人而

俟天也若釋氏之教以現在爲不可得使與過去未來同消歸於幻妄則至者未至而終者杳不知其終矣君子服膺於易執中以自健舍九三其孰與歸

坤

太極動而生陽靜而生陰動者至靜者不至故乾二十四營而皆得九九者數之至也坤二十四營而皆得六六者數之未至也數至者德亦至數未至者德有待矣德已至則不疾不速而行固健德有待則待勸待勉而行乃無疆固健者不戒而行調其節而善之御之事也無疆者從所御而馳焉馬之功也天以氣而地以形氣流而不倦於施形累而不捷於往矣陽以樂而陰以憂樂可以忘其厲而進憂足以迷其方而退矣則坤且凝滯裴回而幾無以荷承天之職也故易之贊坤必贊其行焉夫坤何爲而不健於行也流連其類而爲所繫也西南者坤之都也墮山峻巘之區也

據中國言之君子之言言其可知者而已

坤安其都而莫能遷矣

自然不能遷

且乾氣之施

左旋自坎艮震以至於離火化西流以養子而土受其富則坤又靜處而得隕天之福矣其隨天行以終八位而與天合者兌之一舍而已又祇以養其子也

土生金

天下有仰給於彼自保其朋飲食恩育不出門庭而享其宴安者足以成配天之
大業者哉是故君子之體坤也乾化旋而左則逆施而右以承之其都不戀其朋
不私其子不恤反之於離以養其母凡四舍而至於東北之艮艮者一陽上止閔
坤而不使遂者也坤至是欲不棄其懷來而不得矣夫陽之左旋也艮抑陰而止
之震襲陰而主之離閑陰而窒之將若不利於陰而陰且苦其相遇而不勝然閑
之使正襲之使動抑之使養其有餘則亦終大造於陰故隕天之福爲陰慶者非
陰所期也而實甘苦倚伏之自然使陰憚於行而懷土眷私僅隨天以西旋於兌
亦安能承此慶於天哉則坤之利牝馬者利其行也君子之以喪朋爲慶者慶其
行也夫地道右轉承天之施以健爲順蓋亦坤德之固然而易猶申之以戒者爲
君子攸行言之也六三之或從王事義猶此爾內卦體艮而坤德成矣猶乾德之
成於乾乾至至此而終終此也四以上坤之時位矣

氣數非有召而至陰陽不偏廢而成然則易言履霜而聖人曰辨之不早使早辨
之可令無霜而冰乃不堅乎則可令大化之有陽而無陰乎曰霜者露之凝也冰